




Senin, 18 Januari 2021
Ogen: Jeremia 41: 1-17



Ulih La Metenget



Pedah orangtua “lalit upah melantar” biasana ibelasken jadi sada pengajaren entah persinget gelah tetap erjaga-jaga ope denga jadi si la bagi ukur si mahanca erkadiola. Adi enggo jadi si la bagi ukur ban melantar ndai, nina mis orangtua “ningku pe sange ola bage, enda lanai si eteh pe uga nari man bahanen.” Janah kerina lanai lit gunana. Adi nakan enggo jadi bubur lanai banci ibahan jadi nakan mulihi.

I bas oratenta enda pe tangkas maka enggo pernah ngerana Johanan man Gedalya nina ersura me Ismael munuh Gedalya. Tapi ialoi Gedalya, nina: “Ola bage! Si ikatakenndu kerna Ismael guak kap e!” Enda jadi pengantar i bas bindu 40: 16. La lit sitik pe ukur curiga i bas Gedalya man Ismael, e maka la ndekah kenca kata persinget si isehken Johanan, jadi me peristiwa pembunuhan e (41: 2). Enda me ulih la metenget, kata persinget si ikataken man Gedalya la jadi pelajaran man bana, la erbahansa ia erjaga-jaga entah idaramina dalam uga metehsa tuhu siikataken Johanan e entah lahang. Tek saja ia maka Ismael labo lit ukurna ilat man bana. kepeken Ismael enggo berencana rasteman-temanna munuh Gedalya sebab akapna Gedalya enda kaki tangan raja Babilon. Ismael segat kal atena Rajanebukadnesersi enggo ngekernpken kutana Juda ras Jerusalem. Meteh kerna mesangatna kekejamen ras perbahanen Ismael ras teman-temanna, maka si sepuluh kalak teman Gedalya cari akal, minter rukur ia uga carana gelah ola ia ikut terbunuh maka nina lit buni-bunin kami bas juma, eme: jaba, gandum, minak saitun ras tengguli. Enda mahanca ia kerina ipulahi. Banci inilai maka tindakan si sepuluh kalak ngasup njagai dirina gelah ia ola ikut kerp ras sienterem e.

Bas kegeluhenta enda perlu tetap kita metenget! Sikataken bujur adina lit sinuriken kerna ancaman bahaya nandangih seh banta, minter siperlengkapilah dirinta. Bicara lalit singatakenca uga carana kita metenget? Eme alu tetap ertoto. Sada bagin arah pertoton Tuhan: “Ola min kami ibaba Kam ku bas percuban, tapi olangilah kami idur si ilat nari.” Tek kita maka Dibata tetap njagai kalak si tetap erpengendes man bana.

